

Vizyon

R65,000 par mwan!

O norab Marie-Louise Potter in ensilte Seselwa ankor enn fwa. Atraver son larogans, in deklare ki li i dakor avek en Sef Ziz etranze ki ganny en lapey R65,000 par mwan. Me konmsi sa pa ti ase, sa gran madanm in menm ensilte tou bann avoka e ziz Seselwa. Dapre sa madanm sel keksoz ki enportan konsernan nasyonalite en ziz se ki i 'entelizan, enparsyel e konpetan'. Dan sa ka, si Mr. Michel in war zis en Ugandan pou travay koman Sef Ziz e les tou bann Seselwa ater, dan sa ka, Mrs. Potter pe dir nou ki tou nou bann avoka e ziz Seselwa se zis bann lenbesil ki napa kapasite ansarz nou lakour isi Sesel. Sa i fer onte pour en dimoun ki reprezant pwenn-vi en parti politik ki sipoze met Seselwa o-sant devlopman.

Gro lapey zis pour etranze

Dan en moman kot Seselwa ordiner pe trimouse e pe annan tou kalite rediksyon dan servis e dan lasistans, Mr. Michel ek SPPF i war li apropiye pou fer en etranze vin Sef Ziz e donn li en lapey R65,000 par mwan. Zis pou ganny sa boug, zot in bezwen ogmant lapey sorti R34,000. Sa i vedir en logmantasyon **R31,000** oubyen **91.2%**! Sa i en rikord dan nou pei. Fodre ki Seselwa i not sa byen menm, akoz i ava donn zot en lendikasyon ki zistans Mr. Michel i pare pour li ale zis pou protez etranze dan nou pei. Sanmenm sa Parti Lepep? Oubyen i plito Parti Lepep etranze?

Oli larzan pour Seselwa?

I vreman regretan pou dir, me SPPF i vreman vin en parti ki regard zis etranze. Letan Seselwa pe trimouse, e nou dan SNP, nou pe demann en logmantasyon lapey pour bann travayer, SPPF i sourd lo sa lapel. Selman

zot pare pou donn gro logmantasyon bann etranze ki pa ni osi kalifye ki nou bann Seselwa. Seselwa pe soufer, me etranze ki ganny gro larzan. Eski nou bezwen okenn lezot laprev pou montre ki SPPF nepli enterese avek Seselwa, me plito avek lezot lepep?

Oli prensip ek Senserite SPPF

SPPF pou mor en parti ki koz langang. Madame Potter i vini e i osi dir ki pour ziz ganny plis ki Prezidan i normal, e ki sa i arive Langleter. Sa ki i bezwen dir nou se dan sa ka akoz ki lapey Sef Ziz ti pli ba ki lapey prezidan e ki i zis la aprezan ki zot pe al fer li pli o, zis akoz sa nouvo Sef Ziz sorti

Uganda? Kan eski sa madanm, ansanm avek son parti pou aret bat latet Seselwa? Akoz i servi Langleter zis dan son faver? Akoz zot pa swiv lezot keksoz ki pe arive Langleter tel ki lendepandans Speaker e adopte model BBC pou amelyor SBC? Oli zot senserite?

Lepep Seselwa pa dakor donn lapey R65,000

Lepep Seselwa pa dakor donn Sef Ziz sorti Uganda en lapey R65,000 par mwan. Seselwa pa war akoz ki en etranze i bezwen ganny en lapey sitan o. Nou demann Gouvernman ek tou dimoun konsernen pou regard sa ankor. Lepep Seselwa pa kontan e nou pa dakor. Donn en vre Seselwa sa pos.

Michel lo kote kriminel



Sa portre i montre nou prezidan lanmen prop pe asiz lo kote Mr. Bashir, prezidan Sudan kont ki i annan en warant pour krim kont limanite an Darfur. I responsab pour lasasina zanfank fanm. Mr. Michel i resanble byen konfortab obor sa boug ki Lakour Enternasyonnal Kriminel pe rode. Vreman nou prezidan pa serye. I montre nou ki malgre i tay Lerop pour led, i anvoy zot pronmnen e i tanpi. Sanmenm sa lanmen prop?

Belmont pe ale

Vis Prezidan Belmont pre pou ganny met ater. Lepep Seselwa in note ki manner Mr. Michel in apwent Mr. Danny Faure koman Sekreter Zeneral olye Mr. Belmont. Tou dimoun ti kwar ki Mr. Belmont ti ava ganny sa pozisyon vi ki i deza Vis Prezidan. Me keksoz i totalman diferan e i kler ki Mr. Belmont pre pou fini son karyer dan politik.

Me sa pa tou. Mr. Danny Faure pe byento ganny apwente Vis-prezidan, e Mr. René in fini fer kler avek Mr. Michel ki si i pa fer atansyon se pa li ki pou debout koman kandida dan lot eleksyon, me plito i pou met Mr. Danny Faure koman kandida ek Mrs. Potter koman kandida Vis-Prezidan!

Antretan Mrs. Frichot i ranpli avek laraz akoz i nepli annan okenn pozisyon dan parti. Nouvo Sekreter Zeneral in fer kler i se li ki pou kontrol travay parti. Avek sa bann devlopman, i annan plis konfizyon ankor dan SPPF.

Pour le moman Sesel i annan en Prezidan ki ganny kontrole par Per Fondater. Nou annan en Vis Prezidan ki ganny kontrole par Minis Finans, e nou annan en parti politik opouvwar ki nepli konn son idantite. Vre nou dan en gro problem. In ler pour sanzman.

Disan i kontinyen verse

Tou dimoun i konnen ki SPUP/SPPF in en parti ki n responsab pour versman disan dan nou pei. Ozordi letan SPPF i decide sanz son non, disan i kontinyen ganny verse. Vreman sa parti i en malediksyon pour nou pei. Nou pei i bezwen rekonsilyasyon e linite. Fodre disan i aret ganny verse e nou pep i ganny en nouvo komansman. SNP i sa sel parti ki pou anmenn sa sanzman.

PAS PARTOU

Ki Ramados i anvi?

Sa boug i kontan tit. Letan ti annan eleksyon pour Tyermenn Medical Council, i ti fer kanpanny e ganny elekte. La in fer menm zafer avek Chamber of Commerce. In al rod bann marsan Endyen pou vot pour li e la in ganny elekte Tyermenn. James Michel i anbarase, me li i vant e menm maltret bann lezot manm lo son papye. Eski i anvi vin Prezidan Sesel? Sa enn wa tat ou delo zwer.

Michel i prefer avyon Arab

Ankor enn fwa Mr. Michel in montre ki

avyon Air Seychelles pa ase bon pour li. In al Zimbabwe, e in prefer vwayaz dan Emirates olye desann dan Air Seychelles Sid Afrik e apre retourn dan sa menm avyon. Eski i pe dir nou i pa fye sa avyon, oubyen i senpleman prefer avyon Arab? I kit avyon lepep ater!

Problemm avyon IDC

Malgre tou sa bann gran-gran koze par Mr. Glenn Savy, i pa kapab dir ki avyon IDC napa drwa fer okenn vol enternasyonnal. Lontan i ti al Moris ek La Réunion pou anmenn bann gro imsyte fer shopping, me ozordi pour rezon sekirite avyon, zot nepli kapab. Avyon i anvol zis dan teritwar Sesel.

Lazenes Seselwa: rod ou laliberte

I fer lapenn ozordi pou vwar ki SPPF pe kree en laklas egois e opportunis dan nou pei. SPPF pe servi larzan, pozisyon avek promosyon pour enflyans enn de zenn e fors zot vann zot nanm. Bokou sa bann zenn i swadizan entelizan. Me i domaz ki promes bann keksoz materyel parey later, lakaz, loto, louvraz ek biznes i zot priy-orite.

Yer nou gran paran ti lite pour anmenn egalite dan Sesel, pou fer sir ki tou Seselwa i ganny akse avek larises pei, later ek louvraz. Me sa ki sa bann zenn oportinis i oblize realize i se ki ozordi SPPF pe servi sa menm keksoz pour pini en lot zenn parey zot, ki pa kwar dan prensip parti o-pourvwar. Sa ki pa kwar dan zot ideoloji i ganny viktimiz atraver sistenm Security Clearance e ganny peze par Ladministrasyon Distrik e bann MNA SPPF.

Sa ki pir ankor, malgre son deklarasyon ki i annan en leker pour tou Seselwa, aksyon Msye Michel pe dir avek bann zenn si zot swiv li zot pour ganny gete, me sa ki al kont li pour ganny kit ater ouswa a lekar.

SBC fodre vin endepandan

Le 3 Oktob 2006, Sesel ti konn enn bann zour pli nwar dan son listwar modern. Disan nou frer ti verse letan en group dimoun brav e determinen ti pe reklann nou drwa lekspresyon. 3an apre nanryen pa'n sanze.

Malgre plizyer milyon rroupi in ganny depanse lo lenvestigasyon Ziz Reilly, Msye Michel in zis fou sa dokiman dan en tirwar State House. Napa en sel rekomandasyon sa ziz Irlande ki SPPF in pran o serye. SBC i ankor telekel – i pa endepandan, son management i swiv zis lord sorti State House e tou raportaz i ankor ganny manipule pou fer gou-

vernman SPPF pas koman en lanz. SNP i kont lafason ki en lenstitisyon ki bezwen larzan piblik Seselwa pou li fonksyonen, i sitan favoriz en sel parti politik.

En gouvrenman SNP pou sanz lalwa SBC pou asire ki i vin lib e zis e ki tou lopinyon politik i ganny trete parey. Antretan SNP pe pourswiv son lalit pou war en SBC lib e endepandan. Nou envit tou Seselwa ki anvi vwar sa arive pou zwenn dan sa kanpanny e met presyon nesaser lo gouvrenman pour ki Sesel i ganny en lorganizasyon ki tou Seselwa i fyer. Nou pei pa pou kapab kontinyen avek en medya leta ki sitan kaylous. Change please!

Sanenmen sa latitud en prezidan ki dir 'lepep se li e li se lepep'? Ki kalite sa? Ozordi lalit zenerasyon zenn Sesel i bezwen pran en lot dimansyon. Nou laliberte i an menas. Sesel i ankor lwen avek bann norm demokratik enternasyonal ki pou rann tou sitwayen lib. Isi drwa lekspresyon i ankor pe ganny peze. SPPF i kontrol servis radyo avek televizyon, Lasanble Nasyonal i la zis pou aprouv tou proze gouvrenman, sistenm zidisyer i ganny manipule ler zot oule keksoz i ganny zize an faver gouvrenman, lapolis ek larme i ankor de lorganizasyon ki ganny servi par gouvrenman SPPF pou britaliz nou popilasyon, lapel pour annan en Komisyon Elektoral pa ankor oule ganny aksepte e laplenn politik an-zeneral dan Sesel pa ankor nivo. Sesel i bezwen sanzman.

I devwar sak zenn pour lite e rod sa bann sanzman. SPPF pe mentenir sa bann lenzistis, zisteman akoz i pe senpleman fer keksoz dan son lavantaz. Lazenes Seselwa, rod ou laliberte. SNP i dan ou kote, me ou osi ou bezwen annan sa langazman e volonte. **Ansanm nou kapab e nou pou fer li.**

Lasanble Serye?

Nou'n antann koz bokou lo en Lasanble serye. Me parey zot labitud SPPF i mank senserite. Akoz ki 24enn kongre SPPF ti fer Mardi le 2 Zen, premye sesyon 2enn trimes Lasanble Nasyonal ti oblize anvoye. I malere ki program en lenstitisyon ki sipoze endepandan e annan travay enportan lo nivo nasyonal pou fer i ganny enteronpe. Speaker in al sitan lwen e anpes serten manm Lopozisyon adres Msye René koman Per Fondater. Si parti pa ti anvi zot dirizan i ganny boufonnen, zot tya remer-sye li e demann li pou al zouir son vye zour.

Antretan bann reprezantan lepep in vin 22 po fler. Pour en lazourmen antye zansla zis i sof sez dan Lasanble e pa dir en mo. Olye defann lentere zot zabitan ki'n elekte zot, zis zot raporte tou lesemenn pou vin bwar dite e manz gato. Sa ki santi sa soulye pe mord li, demisyonnen!

SNP Nou Pou Touzour La Pour Zot